

少師朱襄毅公督蜀疏草

少師朱襄毅公督蜀疏草卷之

議留朝覲官員疏

欽差總督四川兼制湖廣荆岳鄖襄四府陝西漢中一
府軍務策應緩急督理糧餉兼巡撫四川等處地方兵
部左侍郎兼都察院右都御史臣朱燦元謹題爲戎馬
未息料理需人議留入覲官員以安地方事據四川布
政使司呈奉臣紙牌照得朝覲大典羣牧四朝述職之
意惟是蜀值大難以來事雖稍寧黔警狎至戎馬未遑

四郊多壘或借材於監紀督餉或專責於奠服保安更有轉餉四方奔走行伍如叙瀘渝遵一帶最當其衝者不得不議留一二以資其事及查部文有事情重大不可一日缺正官者聽臨期酌量奏留合行查議除會按院外仰司官吏卽查九府六州各縣某某地方有何重大事件某某地方近夸軍旅某某見在監紀督餉應否議留正官以資料理逐一查確通詳以憑會題留任其人不得託故保留致妨大典等因奉此又蒙巡按溫御史憲牌前事蒙此俱經通行各府州縣查議去後隨准

兵巡下川東下川南遵義道各牒及合屬申覆到司該
本司右布政使詹爾達議照有司正官三年一覲大典
也地方無事自宜恪守成憲孰敢輕議乞留惟是蜀自
蘭首犯順東西南三道郡邑多被殘破而派夫徵餉今
經三載閭閻十室九空溝瘠剝肌及髓其有不忍見聞
者况加之旱魃爲祟瘟疫頻行流移死殣又復強半所
藉以出之湯火沃之清冷少緩須臾之死再圖樂利之
生者非議留正官多方撫輯無足以爲之地矣且蘭土
雖清而援黔善後更資多官分理蓋毒流四境非止一

隅而多一官之留卽獲一官之用合無請乞本部院軫
念蜀省多事資人分理黔省需援用官益切俯從道府
所議將成都府知府許士奇叙州府知府劉澤大重慶
府知府余新民馬湖府知府鄭朝棟龍安府知府伍元
正夔州府知府史贊舜遵義府知府胡悅安嘉定州知
州李一鳳詹州知州吳瓚瀘州知州王新民合州知州
呂應熊涪州知州朱毅臣長壽縣知縣徐爾一江安縣
知縣陳龍光大足縣知縣鄭元凱永川縣知縣張堯揆
榮昌縣知縣李雲衢閬中縣知縣周維光安岳縣知縣

趙民戴遵義縣知縣丘可恆俱留在任料理一應本冊
差吏齎部再照遵義府屬綏桐二縣典史未補遵義縣
典史胡一家憑尚未到仁懷縣典史石菊士民保留邊
地無官併乞免覲且四縣文案煨燼一應文冊併乞免
造等因回覆到臣該臣會同巡按四川監察御史溫臯
謨議照得入覲大典理當恪遵遠方小臣得仰天顏而
祝聖壽尤所踴躍者顧事勢偶有不同成例自難拘執
就蜀論之蘭局未結黔事中變建南松潘處處告警此
何等時也各官往返多至經年代署匪人百務俱廢臣

等將何所責成以措手足乎卽不敢一槩議留其關係
喫緊不容一日離於地方者如成都府知府許士奇重
慶府知府余新民當東西倥傯之衝值兵火傷殘之後
催餉理器百責交萃叙州府知府劉澤大逼鄰諸苗警
信時至馬湖府知府鄭朝棟尚在軍中未便離局夔州
府知府史贊舜爲楚蜀咽喉近經黔省招兵亟資彈壓
龍安府知府伍元正爲松潘要衝時下蠻苗跋扈正賴
安輯遵義府知府胡悅安尚在綦江督理糧餉瀘州知
州王新民眉州知州吳瓚涪州知州朱毅臣合州知州

呂應熊皆爲沿江孔道理餉押兵頃刻難移嘉定州知
州李一鳳係建南要道時方集兵不可缺官大足縣知
縣鄭元凱永川縣知縣張堯揆榮昌縣知縣李雲衢安
岳縣知縣趙民戴長壽縣知縣徐爾一江安縣知縣陳
龍光均係殘破之後亟資撫輯而調兵催餉俱有分委
閬中縣知縣周維光秦蜀極衝地方多事遵義縣知縣
丘可恒因府城殘燬尚借居綏陽以上七府五州八縣
勢所不得不留者遵義典史胡一家仁懷縣典史石菊
該司旣以邊地乏人理合一併具題伏乞勅下吏部覆

議上請將知府許士奇余新民劉澤大鄭朝棟伍元正
史贊舜胡悅安知州王新民吳瓚李一鳳呂應熊朱毅
臣知縣徐爾一陳龍光周維光鄭元凱張堯揆李雲衢
趙民戴丘可恆典史胡一家石菊俱免應朝行臣轉行
各官遵照庶事有責成而疆圉諸務不致廢弛矣其各
官事蹟賢否容臣行令造冊差首領同吏徑齎部院以
俟查處至於遵義綏陽桐梓仁懷四縣止造簡明文冊
差吏齎部爲此具本謹題請旨天啓四年六月十九日
上奉聖旨

開銷帑金楚餉疏

題爲恭報前後收支兌發帑金楚餉數目以便開銷事
蜀苦援遼帑藏盡那酋變以來公私一洗前後蒙皇上
發帑戶部兌解及徑動楚餉留四川應解銀兩爲數頗
多然始發者有前督臣與郎撫太僕支用繼發者又奉
明旨量撥通融其留用一項各有司俱稱預支那借酋
變之後奉旨蠲免徒有虛數未得實濟蓋戶部咨發則
曰四川發難以來前後發兌動支銀一百七十萬有奇
而收支應用則郎撫領過帑金楚餉前後共三十萬一

千有奇太僕領過五萬前督臣疏開四十五萬外又給
秦明屏及轉解辰常者八萬共筭五十三萬其後明旨
一日通融一日量撥與夫目下拖欠實計臣接任以來
收過兩京帑金楚餉共三十三萬二千零時以援黔請
餉臣於疏中畧一點明收過實數及後督餉御史入楚
憐蜀困乏催督藩司二起又共解九萬四千五百二十
三兩四錢七分一毫總而計之臣前後實收京帑楚餉
共銀四十二萬二千五百二十三兩四錢七分有奇今
南京戶部實欠五萬兩湖廣布政司實欠一十四萬八

千一百八兩三錢八分三釐九毫三絲三忽九微一塵
六纖該司曾報差官方蔭枝領解五萬兩入蜀但至今
未到除留川省錢糧三十二萬零見在委官盤查另疏
奏聞頃者臺省交章謂蜀帑當查而臣病苦行間亦不
得不先爲列數開報備查五路討蘭之兵十六萬六千
有奇自天啓二年九月至三年五月取永寧後始汰去
六萬六千留用十萬又自天啓四年二月搗巢援黔之
後汰去五萬祇留五萬若按日給直其費不貲每每鼓
以上賞激以雪憤有數月無糧不敢譁者一切收發道

府取有印信實收支則俱由道府取有印信文領在卷
斷不敢朦朧草率泥沙濫用其細數文冊俟另同本省
用過錢糧分別造冊具奏外謹先列收支拖欠轉解總
撤數目開坐上聞伏乞勅下戶部銷筭未完者俯賜催
發施行至於前督臣私借河南絲價銀兩臣因接管時
三軍告糧急如星火無銀應手只得行重慶府於前項
絲價內借支二萬兩散給遵義兵士今准河南撫臣咨
催但蜀中疲困已極前銀實難措還併乞勅部開銷轉
行河南四川知會緣係恭報前後收支兌發帑金楚餉

數目以便開銷事理未敢擅便爲此具本謹題請旨

計開

一前後發兩京京帑共一百零六萬兩

鄖陽撫臣楊述中二起領過十五萬兩

太僕劉時俊領過五萬兩

前督臣張我續疏開各起解到支用共四十

五萬兩

查前督臣疏云四十五萬內一發十一萬兩

收貯四川布政司聽臣支用銷筭行據布

政司回稱前督臣支一萬兩解遵義道散
給官兵訖天啓二年三四兩月分又奉兩
院四起批允共動支二萬四千三百七十
九兩九分解上川東道給散取渝漢土官
兵并加銜副將秦明屏推官胡平表石砭
土司領作前兩月糧餉取有印領在卷又
於本年三四五月又奉臣與按臣陸續批
允共動支九萬五千六百二十兩九錢一
分解川南道取叙瀘建武一帶官兵領作

前三箇月月糧取有印領在卷以上雖曰
聽臣搗巢支用實在前督臣調遣攻取月
日內已支用無存

又查前督臣疏云四十五萬內進士李春旺
解蜀銀五萬兩到夔檄發夔州府分解納
谿建武合江遵義四路俟搗巢完日聽四
川撫臣銷筭行據夔州府回稱前銀又奉
前督臣於內取一萬兩轉解辰常止有四
萬兩照文分解各路餉道補給官兵已前

歷過月糧訖取有印信領狀在卷

又查疏開支剩帑銀一百八十五兩零九分
見貯合州庫查此銀見存未動以上各款
共筭領用帑金六十五萬兩尚該四十一
萬兩

臣接管以來天啓二年十月十四日收評事
曾守身解五萬兩三年二月十五日主事
王儀解六萬兩三年十一月十三日南京
戶部差官呂希聖丁世臣解五萬兩共收

十六萬兩行據布政司并督餉道查收動
給官兵歷過月糧訖取有印收領狀在卷
其餘准戶部咨稱三起兌留於楚派新餉
內抵解四川銀共二十五萬兩此前後發
兩京京帑共一百零六萬之數也其兌於
楚者流入下款開報

一前後兌發徑動湖廣餉銀共五十三萬五千
二百四十一兩連上款流下兌帑二十五
萬兩共七十八萬五千二百四十一兩查

戶部議奉明旨於後發楚餉銀二十三萬
五千四百二十一兩內題奉聖旨批定量
撥十萬兩與四川於內又開除一十三萬
五千四百二十一兩訖

湖廣前後實計該六十五萬兩解蜀

鄖撫三起支用過十五萬一千七百二十六
兩三錢二分一釐九毫六絲六忽八塵四
纖

前督臣支過一萬八百兩給秦兵援黔又支

一萬九千二百兩又支五萬兩解轉辰常
以上共用過八萬兩

湖廣布政司冊報前督臣并鄖撫太僕又共
支徑用過三千六百一十六兩七錢九分
四釐一毫此項臣不知其故應行該省查
確以上各款支用開除銀二十四萬五千
三百四十三兩一錢一分六釐六絲六忽
八塵四纖尚該四十一萬四千六百五十
六兩八錢八分三釐九毫三絲三忽九微

一塵六纖

臣接管以來天啓三年二月初三日收該省
布政司差官林應舉解三萬兩三年五
月初六日差官馮天寵王尚賢解六千兩三
年六月十二日差官顧言許國柱解八千
兩三年九月初二日差官王三聘解六千
兩三年九月初八日差官余國傑解二萬
兩四年正月二十八日差官林應舉又解
五萬兩四年三月十四日差官陳嘉言解

五萬二千二十五兩二分九釐九毫臣具
疏後又該督餉按臣部臣催督差官謝繼
安於四年五月初六日解四萬四千五百
二十三兩四錢七分一毫四年七月初三
日差官唐宗珫解五萬兩九起共收銀二
十六萬六千五百四十八兩五錢行據叙
州府重慶府瀘州秤收明白取有印信庫
收陸續據各道府請詳支散各路官兵歷
過月糧訖取有印信支領在卷

一湖廣尚欠一十四萬八千一百八兩三錢八分三釐九毫三絲三忽九微一塵六纖據該司文報數內又差官方蔭枝領解五萬兩但至今未到

一南京戶部欠銀五萬兩未解總計臣接管起實支用過帑金楚餉共四十二萬六千五百四十八兩五錢又借用前督臣私借河南絲價銀二萬兩併請開銷通行遵照天啓四年七月二十六日上奉聖旨

縣令給由疏

題爲遵例考覈給由官員事據四川布政使司呈奉臣
批據德陽縣申准本縣知縣李應元關稱見年三十六
歲直隸真定府趙州人由舉人泰昌元年十月二十五
日除授今職天啓元年四月初六日到任扣該天啓四
年三月初五日連閏歷俸三年任滿例應給由照詳奉
批仰布政司查報奉此又蒙巡按溫御史批同前事蒙
批布政司查報蒙此行准按察司守巡鹽法等道各咨
牒回稱查得本官委於前項年月日期到任歷俸考滿

任內徵收錢糧鹽課清勾軍伍積貯稻穀五事實政俱已足額修舉委官盤量無異應准給由開具經薦稱職詞語起送到臣卷查先准吏部咨爲酌議考課之法以肅吏治事內開今後府州縣正官給由免其赴京聽撫按官從公考覈賢否具奏先令就彼復職管事牌冊差人齎繳其稱職經薦應得誥勅命者照例請給其平常不稱職者部院會同酌處又准吏部咨爲酌時宜陳愚見等事內開遇有方面有司官考滿從公考覈據實直書分別稱職平常不稱職三等填註考語具題給由以

憑本部議處又准都察院咨爲治平要務急在保民等
事內開省直撫按遇郡縣各官考滿總將三六九年修
舉過五事實政覈實造冊定稱職平常不稱職之差等
另報部院各等因俱題奉欽依移咨通行在卷今據前
因該臣會同巡按四川監察御史溫臯謨考覈得德陽
縣知縣李應元勵精任事砥節愛民解圍功著臨戎署
篆名高飭法本官職業俱修考居稱職除批令帶俸管
事任內行過事蹟徑自造冊差人齎繳五事冊捐行令
咨送部院外理合具題伏乞勅下吏部將知縣李應元

再加考覈酌議題覆施行爲此具本謹題請旨天啓四年七月二十六日上奉聖旨吏部知道

議補鎮道中軍疏

題爲議補鎮道中軍旗鼓以重事權事據監軍道僉事
劉可訓呈奉臣批據總兵李維新呈稱各鎮奉例設立
中軍旗鼓已久獨本職員下未補查得加銜叅將張洪
烈加銜守備趙瓚才勇兼備功苦竝隆乞將二官俱授
以守備署都指揮僉事張洪烈管職標下中軍事趙瓚
管職標下旗鼓事以資援黔等因奉批仰監軍道查報
奉此隨移該鎮回稱新設中軍旗鼓戎政便覽中如九
邊廣東福建山東俱係題授實職况職衙門體統頗隆

責任更重兼值師旅繁興之際用人爲急請乞俯念二官從征日久屢屢斬功有據轉達具題等因到道該僉事劉可訓看得總鎮標下中軍旗鼓二員承平之日向從材官聽該鎮自爲選用今當戎馬倥偬之際據該鎮回稱近日新例九邊廣東福建等處俱已備員則該鎮中軍旗鼓固可援例卽以二官填補矣請乞俯念二官從戎兩年屢戰功苦題授前項員缺令其督兵援黔以酬其勞以資厥事等因到臣臣以蜀中鎮道皆在軍前新設中軍旗鼓勢不可缺乃於身親血戰從征有功各

官內揀選陸續咨補如重慶衛指揮馮世修從征日久
勞苦居多曾咨補兵巡上川東道中軍守備叙南衛指
揮魯希聖取永搗藺屢著勞績曾咨補叙馬瀘兵備道
中軍守備加銜守備王胤昌攻渝復瀘功績纍纍曾咨
補兵巡下川南道中軍守備保寧所指揮蕭鳴鳳傳宣
戰守功著解圍曾咨補安綿兵備道中軍守備至今俱
未議覆今據道鎮開稱張洪烈趙瓚二官者向隨鎮臣
攻青山取永寧破古藺搗龍場每每身先血戰破敵摧
鋒斬功有據者也况道鎮中軍旗鼓俱奉有明例而各

該衙門又見在軍前需人料理之時既經議詳前來相應一併具題伏乞勅下兵部再加查議請將張洪烈補總兵官標下中軍趙瓚補旗鼓馮世修補兵巡上川東道下中軍魯希聖補叙馬瀘道下中軍王胤昌補兵巡下川南道下中軍蕭鳴鳳補安綿兵備道下中軍各加以守備署都指揮僉事職銜體統行事填給憑劄俱行臣轉行各該衙門遵照行令各官任事俾道鎮諸臣有所勗勤而血戰才勇之士愈奮力報効矣爲此具本謹題請旨天啓四年七月二十六日上奉聖旨

議裁守渝副總守備疏

題爲議裁冗官以省浮費事據四川布政使司呈奉臣
批據協守四川重慶副總兵魯應魁呈請廩給操賞等
項由詳該本司林左布政使查得本官每歲計筭廩給
公費紙劄等項該銀一千四百四十餘兩當時前部院
在戎馬倥傯之中需人彈壓動支軍餉今本官到任要
援松潘副總事例支給今民窮財盡之日似難全允合
無量支四分之一隨俟議處等因由詳奉批渝城舊不
設將今無衙門無軍兵一切供應將從何處措辦則此

官似亦可裁仰會同按察司查議詳報奉此又蒙巡按
溫御史批據該司呈同前事蒙批腹裏與巖邊倥偬與
承平自難相提而論亦該協所相諒者調劑裁省在該
司酌之蒙此俱經移會按察司并巡上東道查議去後
隨准牒稱該本司按察使李守俊看得渝城向來原不
設將一切衙門軍兵供應措辦艱難矧兵火之餘惟節
省爲惠是時永遵防禦周備此官委似可裁以省冗費
等因又准兵巡上川東道牒稱該本道左布政使閔夢
得看得渝城初復之日賊勢尤甚人情尚多踴躍蒙前

部院題設副總以防禦之第今逆酋逆竄蘭土廓清已
大非昔日景象况重慶當殘破之後小民膏髓已竭若
復添將添兵一切供億安從取給且向無額設衙門僦
居民房於體甚褻日逐需用捐費自備於力難支至於
防兵二千五百名計一歲應給月糧幾二萬兩斷非予
遺之民所能辦者此官委屬可裁如魯副總壯志橫雲
一鶚雄才吞海六鰲志切擒酋廉能驅鬼以彼長才而
置之散地深爲可惜本官亦屢具文請改他任伏乞具
題另行推用尤愛惜人才之至意也副總之外尚設有

守備一員專爲操練兵馬防守城池今奉部文兵巡衙門銓註中軍守備則操練事務正其職掌似不必復添蛇足以耗民財相應一體併裁各等因備牒到司該本司右布政使詹爾達看得古渝腹裏近地從來未有兵將之設頃緣恢復之後永遵未靖思患嚴防觀變修武故用魯副將協守一時權宜計耳今藺土旣已廓清則屯駐非關要害時移局換暫設顧可久仍乎况一切供應爲費不貲公私交困安從措辦且以本官干城之器置之閒曠之地亦非所宜其員下練兵守備一體併裁

似應如議俯賜具題另銓亦節冗佐虛需材善任之道也等因通詳到臣該臣會同巡按四川監察御史溫臯謨議照得重慶增設副總鎮守蓋當時郡城初復人心未定且虞遵永二面賊黨出沒故責令彈壓耳頃者地方稍寧冗兵漸撤本官居無衙門部鮮兵卒留兵二千五百歲費二萬餘金此項錢糧實難措處與其虛拘而自食大褻體統不若議裁俾本官得別地奮揚以展其才略實兩便之策也其標下練兵事務已經咨議該道添設中軍守備料理允應併裁既經議詳前來理合具

題伏乞勅下兵部再加查議覆請將重慶府原議增設
協守副總兵及標下練兵守備員缺與夫增置兵士盡
行裁省魯應魁歷俸已久別爲陞補地方行臣等遵照
施行爲此具本謹題請旨天啓四年七月二十六日上
奉聖旨兵部知道該本部覆奉聖旨是

咨補都司僉書李必茂

爲僉書懸缺日久特舉將材推補以便委用事四川都司僉書陳壯猷奉補年餘至今未任屢詢本官見在黔省効用未便離局於法於例均當另補今蜀方倥偬之秋需材爲急查得標下旗鼓守備李必茂才名烜赫意氣騰驤論兵六出遜奇揮槩萬人必往自解圍破敵與夫入敘恢瀘本官晝夜辛勤料理咸當迄今四年薦經七次查據敘功條例本應優擢况當援黔赴敵之時尤英雄用武之地合無暫照常格陞本省都司僉書頂補

陳壯猷員缺俾得借此名銜就便委用宣勞異域庶意
氣益奮而戎旅有賴矣其標下旗鼓員缺伏候另行推
補合咨本部煩請查照具題將李必茂陞補都司僉書
陳壯猷員缺給劄任事標下旗鼓員缺另候推補施行
天啓四年七月二十六日咨兵部

就近陞補監司疏

題爲重地急缺道臣酌議就近陞補以資戎馬事天啓四年七月初二日據納谿縣申報四川布政司分守下川南道副使加陞一級赫奕向以代理總餉住居江濱陡於六月二十九日染疾身故印信吏卷理合封解等因已經另疏請卹本月二十五日又據四川按察司叙馬瀘道副使侯國詳稱癰患日深兼以妻亡子病勢甚危篤萬難供職乞賜代題放歸等因據此臣批該道調理日久自當勿藥何又以病請也疆場務重彈壓需材

仰安心任事繳至本月二十四日據叙州府申稱叙瀘道侯副使實因病重將印信文卷於八月二十日徑交本府貯庫起行回籍訖等因查得本官既經離任必難挽留惟是川南地方界在烏撒烏蒙東川鎮雄永寧環列之衝而馬湖一府諸苗錯峙逼近建南彈壓撫綏惟道臣是藉近者二逆雖經窮竄而睥睨窺伺之志尚未能忘群奸乘間造言不曰來取永寧舊物則曰欲抄叙馬上流卽今出哨將領擒獲細作供稱兩苗見糾水西烏撒苗兵欲行大逞而料理援黔諸務又一日難缺查

通省監司如巡上東道布政閔夢得守上南道叅議錢
時以齋奉行新推守東之姚祚端遵義之廉第威茂之
張法孔巡上南之史樹德等俱未履任殊難借才惟巡
下南道副使許士奇蒞任方新然與臣同駐瀘陽止可
料理瀘合二路臣知近來令甲新頒不敢煩聒然軍旅
戒嚴非可同尋常寢閣者又不得不亟爲議請必得就
便陞補庶幾朝奉命而夕任事輕車就熟便於責成謹
查其資俸相應勞苦素著堪以陞任者如叙州府知府
劉澤大千尋勁節萬斛雄才當二逆來犯之日正本官

蒞任之初脩城置器理餉治兵允稱叙南一大保障及
今調停土司查覈奸宄節省餉銀三萬餘金皆有成績
爲士民所愛戴而不忍釋者馬湖府知府鄭朝棟經濟
大才清嚴真品向以監理冰川平夸泥蠻四司土兵初
戰於高縣再戰於長寧與夫取永搗藺二年來無不身
先士卒躬冒矢石蓋與原任道臣李仙品布政閱夢得
僉事劉可訓矢心共濟厥事者至今尚在永寧收支軍
餉而馬湖土兵惟本官能約束之以上二官查俸二年
以上例得序轉况其勞績表表軍民倚重臣謹會同巡

按四川監察御史溫臯謨合詞上請伏乞勅下吏部再加查議如果臣言不謬將副使侯國准令致仕回籍將知府劉澤大加陞四川按察司副使兼叅議職銜填補分守下川南道鄭朝棟加陞按察司副使填補叙馬瀘兵備道各員缺庶軍前諸務不至廢弛其於安民攘奪有攸賴矣爲此具本謹題請旨天啓四年九月十六日上奉聖旨該部知道

優卹總餉道臣疏

題爲亟缺方面官員併議卹典以慰忠魂事據四川布政使司呈奉臣批據兵巡下川南道呈奉臣紙牌據納谿縣申報分守下川南道副使加陞一級赫奕於天啓四年六月二十九日病故緣由據此查得赫大衆守絕一塵事經萬苦不但十年來爲蜀之勞臣卽總餉一事拮据轉運于水陸苗方尤屬盡瘁仰道卽查赫叅政作何優卹有無往例相符具由通詳定奪奉此該本道叅政王世仁看得已故見在行間督餉分守下南道加陞

參政赫奕稜稜峻骨翼翼小心受事於島夸叛亂之時
督餉於地方殘破之日以催科而兼撫字擢脇嘔肝由
儲峙而更轉輸梯山航海飲冰茹蘗些些不染塵埃握
筭持籌粒粒可憐辛苦駐勞草也誅茅而屋疊土而床
相依者藐焉一孫進永寧也蠻煙如幕瘴雨如綿從死
者歷茲數僕鞠躬盡瘁六師士飽馬騰竭力從征九伐
兇酬恥雪何天不佑臨敵而亡風波幸脫於黃泉雪霜
卒銷夫白骨道路辛酸山川黯淡可謂真忠真廉至勞
至苦者也切照各官之功在軍興者有不次之擢死於

王事者有從優之典請乞照例具題以昭國典以勵臣
忠等因由詳奉批仰布政司覆查議報奉此又蒙巡按
溫御史批該道呈同前事蒙批布政司查議報蒙此該
本司右布政使詹爾達看得該道節堅茹淡誼切急公
綜理兵精助勦時變跋涉不避艱險馳驅常衝瘴癘積
勞成瘁積瘁成痼殫力盡忠溘然朝露宦囊羞澁旅襯
淒清琴鶴都成助慄風雲若爲含哀查得征播時監軍
叅政張棟病故行間前總督李化龍具題贈廕廟祀今
赫叅政以死勤事勲勞懋著卹典自宜優厚以慰忠魂

等因通詳到臣查得大明會典款開在外文武官員不拘品級其以死勤事者卹典取自上裁又一款開查有軍旅勲勞懋著者卹典自宜加厚等因遵照外今據前因該臣會同巡按四川監察御史溫臯謨看得分守下川南道副使加陞一級赫奕幹濟盟天矢日操持嚼雪殄冰志切匡時材長經國在蜀十年清操素著自遭酋變卽專督餉深入不毛之地久處瘴癘之場歷勞受傷病竟不起行道之人皆爲隕涕該道原係節制四夸水陸衝要之地最爲吃緊臣已另疏具題乞補外第本官

贊勳等運積勞日久功當紀錄死實堪憐且與會典軍
旅身殲之例脗合理合具題伏乞勅下該部再加覆議
上請將道臣赫奕查例從優褒卹用表忠貞庶幽魂感
佩而勞臣益知激奮矣爲此具本謹題請旨天啓四年
九月十六日上奉聖旨該部知道

恭報建南始釁情形疏

題爲恭報建南情形併議剿撫機宜查叅始釁官員以
安邊圉事天啓四年正月二十二日據建昌道詳文據
行都司掌印都司吳國輔報據團練朱一龍報熱水苗
人自歪報說有僧兩人假以募化通同奢寅妻兄苗目
安世咱爲叛等情遂將世咱擒解到道轉解前來臣令
譯者面加細審與二逆聯姻是的通同之情不肯招承
暫發瀘州羈候又據該道詳稱二月初九日沈渣桐槽
熱水等處叛苗哨聚燒劫南山砦等處該叅將陳廷對

率兵至乾海子斬級五顆奪回男婦牛豬給主訖至十三日又報苗賊復出廷對止帶團操百總周文魁家丁四名併僕二人前至鄧家壩各苗四路齊出廷對身受兩箭折齒破舌周文魁被砍一刀被射一箭各家丁俱中箭殺出重圍等因又據建昌鎮南千總張盡忠等塘報五月初四五等日建昌道調刺兵鵬剿捕擒不意行都司誤聽用苗攻苗苗兵在先官兵繼後入苗等三日之程深入拖卜苗巢人困馬乏忽被苗賊內外衝突陣亡名色千總張其業黃可進廖應武任守同等官兵二

十餘名本道晝夜籌畫捐俸糴餉以致聲息不通各陸續呈報到臣卽馬上飛檄上南道僉事錢時於就近衛所調取守備葉達枝土官馬應乾等會遊擊陳謨率兵一千五百名前去協防又於永寧善後兵內揀撥將官羅文才羅運龍鄔廷高兵五百名兼程前去同陳廷對陳謨等酌議撫諭開通道路及行布政司發餉措辦軍火器具一面行按察司查究失事員役隨於善後勢必留兵疏內上聞臣又聞滇省按臣朱國禎詔使藩士遴學臣楊師孔等與典試二主考時將入滇又檄總兵李

維新分發僉書鄧懋官領兵二千星馳赴該路一面護
送疏道一面相機剿撫間主考二臣奉命中返至七月
二十五日朱按臣楊學臣同潘行人等俱自錦官起馬
陸續往滇省訖七月二十九日據建昌道報稱桐槽熱
水黑林等洞蠻苗見本道內多集兵廣屯糧草鄧僉書
羅文才等大兵繼至分懸本部院大字告示以示必剿
於是苗日安友衣徹衣脚嚕租等三百餘名懼剿伏地
請死剝狗殺牛鑽皮頂經木刻情願護守相嶺瀘治越
舊崑山一帶地方獻出擄去人口牛馬財物及稱桐槽

熱水爲諸洞之冠今已就撫地方必保無虞等因又據
鄧懋官陳謨羅文才等詳報相同該臣看得苗性犬羊
叛服靡定自萬曆四十二年前任撫臣吳用先督同總
兵劉綎剿之後道路清寧雖經總兵黃守魁之剝削
奢安諸夸之叛亂而建南一帶獨爾無恙總由威令之
素行也今年四月內忽報諸夸闕然而起臣甚驚訝一
面發兵應援一面差官撫諭據報六月初三日起至今
羣苗聽撫道路已通詔使按臣等俱相繼入滇矣及查
官兵被殺屯堡被劫關係邊防實非細故蠢爾犬羊何

所屬饜若非鷗剿數洞以示國威其勢決難經久卽蜀
在今日亦非無兵之患獨是師行糧隨實根本至計自
雅州抵建昌爲程一十三日近該錢僉事給銀督運百
計調停所發四千人尙慮不支而欲多集兵將深入險
阻積日累月孰爲供應况鄰警方熾逋兇未獲永寧遵
義兩路聚兵運餉公私之力已竭而又建南一路此殆
不得之數也臣再三思維檄行道將責令獻出首惡盡
還搶掠從權撫定一面查補虛伍脩飭營壘赴今穀熟
多積糧餉譬如治病先固其元氣仍將前後所發兵四

千分布要害申以威信使各苗徧再不出犯卽與相安可也若其乍撫乍叛狡獪莫測然後疏聞議剿亦似未晚至各苗之變必有激而起臣據道路之口皆云拏安世咱以致蠢動臣譯審世咱雖與奢氏至親原非要緊頭目認守有年構逆無跡旣今聽撫宜予寬政隨差材官匡榮耀將世咱押發該道聽其酌量釋放外及查建南一帶額設防兵九千五百九十名而屯軍在外臣自出圍未嘗檄調一卒而一遇有警輒稱無兵者固由糧餉之不敷亦因措置之未當該臣謹會同巡按四川監

察御史溫臯謨叅看得四川按察司建昌道按察使張
邦翼雅負經濟之才適遭紛紜之會本期杜囂反以啓
爭如安世咱係奢賊至親擒之以杜勾連未嘗非綢繆
之計而不意諸苗遂以借口諸苗平日最畏刺兵故調
之以協剿而不意刺兵反戈以致挫損計雖切於固圉
變忽起於肘腋拮据任事之勞實有可原而誤聽輕動
亦似有不能解者旣奉明旨降級毋容再議至於建昌
行都司掌印都司吳國輔疎而喜事闇以僨功初旣輕
舉以激苗繼又妄調以失律無事則縱橫自肆聞變則

縮朒不前損官劫屯誰階之厲邊徼重地可容再壞乎
叅將陳廷對平時雖有控禦之聲聞變忽蹈張皇之失
威重旣損號令不行直待臣差官到而各苗始出效順
亦自不能逃罪但自來軍民相安行道感激一時偶誤
情尚可原理合一併具題伏乞勅下吏兵二部再加查
議上請如果臣言不謬除按察使張邦翼奉有明旨降
用外將都司吳國輔重加降處員缺另行銓補叅將陳
廷對姑責令策勵任事庶失事邊臣知儆而於重地大
有補益矣爲此具本謹題請旨天啓四年九月十六日

上奉聖旨該部知道

府佐給由疏

題爲遵例考覈給由府佐官員事據四川布政使司呈
奉臣批據保寧府申准本府通判許弘綸牒稱見年四
十八歲浙江金華府東陽人由貢生云云各等因俱題
奉欽依移咨通行在卷今據前因該臣會同巡按四川
監察御史溫臯謨考覈得保寧府通判許弘綸品格恬
吟才猷練達裊躬衾影無媿署篆剴決有餘職業俱修
考居稱職除批行令將任內署管行過事蹟徑自造冊
親齎五事冊揭行令咨送部院外理合具題伏乞勅下

吏部將通判許弘綸再加考覈酌議題覆施行爲此具
本謹題請旨天啓四年九月十六日上奉聖旨該部知
道

道臣病休疏

題爲道臣患病乞休事天啓四年八月十六日據四川按察司兵巡下川東道叅議兼僉事曾紹芳呈稱先任戶部主事差管永平邊儲彼時外拒內防增兵增餉寢食俱廢遂致怔忡鬲逆之病天啓三年陞授今職兢兢修職察吏治兵自謂可稍紓上臺憂心之萬一豈期七月初四日忽接家報長子貢生曾獻策於三月內病故聞變悲號吐血數升昏絕在地鬲逆之疾復作數日以來勺水不入口一息不成寐火炎咳嗽血從口鼻中迸

流於是性命之憂彌切功名之念頓灰伏乞俯憐病苦
卽賜代題放歸等因由詳據此臣批該道才名素著經
緯方新西河之痛人所時有何得偶因傷感遽念尊鱸
近日戎馬未息征調殷繁此何等時而可言高尚乎仰
寬懷調理卽出視事繳批行去後又據該道詳稱理應
恭候批示方敢離任而無柰職自聞變以來以六十有
四之年飲食不入口者三日醫生紀從泗勉投數劑結
轡稍開然日止進糜粥一二盞吐血日甚一日頭不能
昂舉目不能久視神極耗而將盡血極枯而垂斃之症

候也已趣裝白達州移駐夔門候示等因詳批從來念
靡鹽者不復顧家該道生平期許何等磊落乃因喪子
之痛遽萌拂衣之念其奈疆場何試較量孰輕孰重當
自翻然矣夔門要地兩院交代伊邇正宜駐劄料理仰
安心任事切勿再萌歸念繳九月二十日又據該道呈
爲病勢轉劇痊可無期三懇恩慈放還以延餘生事切
照職因家難過慟夙病舉發自揣不能供職移夔門數
日名醫官曾友騫診之則云神氣極耗心血漸枯必久
加靜養方得痊愈職遭骨肉之變沉痾之疾又難遽瘳

恐不免爲異鄉之魂矣伏乞本部院憐其病狀去志實
堅稍寬斧鉞之誅卽是生全之德除將印信交夔州府
收貯已出夔巫沿途候命等因又據夔州府報稱曾叅
議將印信於九月初八日送府收貯該知府史贊舜晨
昏訪問多方懇留其如涕泗唏噓病委沉重業已移舟
於十三日出境矣等因呈報到臣卷查先准吏部咨爲
循職掌陳末議以仰裨聖治事該吏科給事中袁國臣
題本部覆議以後請告官員在外仍令撫按官代奏等
因題奉欽依移咨通行遵照外今據前因該臣會同巡

按四川監察御史溫臯謨看得四川按察司兵巡下川東道叅議兼僉事曾紹芳恬夷高品經緯亮猷精神遍注於民暑法紀大張於軍旅雖在事甫及五月而新政綽有可觀正擬展借以膺大受不意其抱病沉疴思歸迫切業已放舟勢難復挽除批令沿途調理候旨外理合具題伏乞勅下吏部再加查議覆請將會紹芳准令致仕員缺另行推補爲此具本謹題請旨天啓四年十月初四日上奉聖旨吏部知道

叅懲青衿凌蔑縣官疏

題爲青衿糾黨凌蔑縣官據實叅懲以剪囂橫事據四
川按察司兵巡下川東道呈據夔州府呈據雲陽縣生
員王文祥詞告知縣李一星貪賊酷法加徵錢糧侵欺
稅課打死義男王躋兒一十三命剋減工食私開賭路
枉贓萬餘陳情等證開欵粘告又據生員譚定薦等呈
爲貪酷俱全懇恩法除急救倒懸以甦民命事情詞於
天啓四年八月內具呈本府該知府史贊舜看得雲陽
李知縣朴實慈祥不謂其嘖有煩言也殊駭觀聽所訟

如真而本官尚可一日居於民上倘事出奇冤則當急
爲昭雪等因詳道又據該府呈據知縣李一星申稱卑
職到任年餘只知奉法不虞鹽場巨惡向世望等十餘
青衿包冒竈課分文不納卑職立法於衆竈戶選有身
家周蓋等十二名每月輪催致難欺騙解過課銀二千
八百兩惡生王政善政簡政美等恐歲爲額不遂騙課
買薑生王文祥與久故譚定薦列名抱狀虛捏條件穢
艱難堪卽污前任朱知縣蒙鑒冤枉僅黜一老生向四
賢慣便本縣往府回縣惡生鼓竈戶百人及夫頭王俊

馬頭屈勝監犯冉正法等千餘持刀執斧先破庫門後破穿堂口稱殺死縣官向表等手扯本縣不許進堂更番罵辱冤寃難當奔走下河投水隨有二教官同船護送到府妻子任辱行李奪搶伏乞垂憫轉達等情除令奉節縣萬知縣前去鎮靜外地方大變惡焰沸騰合行呈報又據該府呈據李知縣呈稱收頭唐問相戈以芳周進賢向繼宗皆鹽場惡黨傾銷低假以少易多用鉄線抵換額解卑職設法嚴禁致招殺身之媒虛捏夥告乞鏡覆盆之寃等情又據該府呈據雲陽縣儒學教諭

華尚信訓導岳民望文可聘申奉本府信牌云本府春日路過雲陽有生員合班捧冊爲李知縣稱頌德政乞賜轉申以旌循良本府以功令有額却之不受忽於六月據該學申據通學廩增附生員列名盛稱縣令功德并岐麥傳比隆於西京振耀於絕代本府異之不意一月之後大翻前局告訐之名又雲陽之諸生豈一令之身前堯後跖半月之內彼聖此狂前頌者今訟者仰列名具報奉此查得生員楊瀛於天啓三年春家產異麥鄉紳王道化等稱讚刻有實錄巷誦人歌黃岐鳳編德

政錄今與訟生員王政善亦刻名在傳可考不期王文
祥王政善脩有此訟人情翻復今諸生不附鼓譟初心
不變者實多而赴訟者止文祥政善一二生也等因申
府查得雲士之頌李令德政方卻步而訐告接踵王文
祥王政善固膚愬於庭連名在呈者且頌且訐實冥頑
之雄非明正爰書無以伏辜等因詳道該本道叅議曾
紹芳看得知縣李一星賦性直厚未諳委蛇其催徵鹽
課洗歷年積逋之弊破豪右包侵之謀徵解獨多於往
昔斯亦能吏也而盤據井竈惡生王政善等疾之如仇

讎計以爲不醜詆不足以敗其官不力驅不足以甚其辱裝點捏開赴府告訐及本官往府辯明回縣則政善等奮臂一呼羣棍響應平日之爲法受譴者皆倚政善等爲戎首相與擠縣官於公署而窘辱之政令迫切赴淵幾墜魚腹自本道任事未見雲陽小民一紙告衙門者官品可知乃因急追鹽課致政善等點污窘迫如此本官未嘗以虐聞也豈任受此哉若不亟爲正法將使雲陽一邑變爲化外而後之爲令裹足不敢入雲也伏乞本部院批委保重夔二府准官將惡生開款及李知

縣申辯秉公審質如本官穢跡果真自應褫斥如係捏
謗則政善等以子弟訕逼父母幾死國有典刑安得輕
貸等因由詳該臣批縣官卽有不法自有惠文法治之
乃雲陽惡生輒爾率衆告訐甚至逼迫幾殉河伯此亦
異變也如呈先行錢李二推官會同蔣推官從公逐款
對質明白送府轉道詳報又據夔州府申蒙巡按溫御
史批據雲陽縣民陳情告爲貪酷事詞稱婪暴知縣李
一星大張賄賂濫准詞狀加耗侵課等情開單蒙批仰
夔州府將本犯固監查審速報如虛解寃蒙此又據雲

陽縣典史汪廷傑口稱本月初四日惡棍用石打入穿堂公然擊柳三次無人敢當卑職匿衙三日不敢出又據雲安場鹽課司大使邢有典申稱鹽場豪惡康時興王得明等恨本職追課挾仇乘縣官被害將大使打傷冠帶公座盡毀蒙清軍廳出牌移職家口棍徒呐喊稱係假票不許搬移等情該知府史贊舜看得雲陽士民真無天無日舉措任其猖狂倫理爲其倒置尚可不爲之寒心哉夫陳情王文祥王政善等之告李知縣或罪在下而罔極出於讒言或罪在上而不仁先爲播惡兇

謀黑變職皆不知惟是知縣一日在位尚雲陽一日之
父母也非有追贓之旨非有革任明文卽積怨未伸當
以黜陟之權還憲臺而併還之天子尤當以曲直付公
論而併付之士師何敢戮辱惟恐其輕斥逐惟恐其晚
磨拳攘臂者惡口嚼面而詬者職蓋虛衷以察亂形平
心以擬其罪案未有劣生持斧於公門豪民拋石於官
舍知縣逼而投江典史畏而閉戶而可置不問者未有
軟禁其妻孥薪水不通而致隣縣之解諭傳梆於堂上
而致吏書潛迹大使之冒頓飽其老拳而仍毀其冠服

同知之府牌擲爲僞票愈肆其魚然而可置不問者此事職卽擬嚴拏而王政善等動以庇護同鄉爲口實伏乞憲臺速委究審主謀脅從之故一勘而本末自明原無假借士民凌逼惡習不成世界速祈正法以維風俗等因呈詳前來臣批雲陽士民結黨以攻父母已屬不法見奉提審尤應靜聽而乃持斧拋磚逼之幾墜魚腹甚至驅逐典史吏書斷家小之薪水全無天日矣仰下東道速照前詳委官鞠審明白招報批行去後該臣看得縣官管理一方爲民父母乃一旦化爲仇讎非其黷

刑以忿虐必或剋取以招尤法紀森然安可假貸獨是
近來士習囂凌罔顧名分得利則刻頌稱揚失意輒捏
詞攘臂毀譽隨意擎擗公行此大非盛世之風卽如知
縣李一星居官不法自有白簡業已准詞提問誰能罔
三尺以庇一官乃王政善等糾聚羣黨公然逼逐種種
兇狀殊可驚駭致本官欲捐軀於河伯道府咸避嫌於
同鄉上下之分全無冠裳之誼盡掃矣除將雲陽縣印
信另委同知賀納賢接管檄催保寧府推官錢允鯨重
慶府推官李必達夔州府推官蔣化龍公同照款會審

依律究擬事關結黨凌虐縣官地方異變應合叅題該
臣會同巡按四川監察御史溫臯謨叅看得雲陽縣知
縣李一星不能芻牧致起怨尤雖未究開欸之實必自
有取謗之因除寃勘至日會疏處分外至於生員王政
善王文祥向世望等擅造好惡之柄妄肆凌逼之威既
已結黨侵權又復犯上作亂士習敗壞乃至於此若不
依律重治何所底止理合具題伏乞勅下該部覆議奉
請行巡按御史將王文祥等所告李一星事併夔州府
所申王政善等肆橫情節逐一勘問查昭情罪從公議

處庶官邪士橫並知儆惕矣爲此具本謹題請旨天啓
四年十月初四日上奉聖旨該衙門知道

縣令給由疏

題爲遵例考覈給由官員事據四川布政使司呈奉臣
批據大昌縣申准本縣知縣易進關稱見年三十七歲
江西吉安府安福縣人由舉人萬曆四十二年十月內
除授本省廣信府貴溪縣儒學教諭四十八年七月內
陞授今職天啓元年二月十七日到任扣該天啓四年
正月十六日連閏實歷俸三十六個月三年考滿又據
榮縣申准本縣知縣蔣守洵關稱見年三十三歲廣西
桂林府全州人由舉人萬曆三十六年十月內除授直

隸廬州府廬江縣儒學教諭丁繼母憂起復補除安慶府太湖縣教諭四十四年陞廣東雷州府遂溪縣知縣本年十月初六日到任四十六年三月十七日丁父憂服闋赴部天啓元年二月內補授今職本年八月二十五日到任除前任歷俸因起復調用不報外扣該天啓四年七月二十四日連閏實歷俸三十六個月三年考滿各應給由照詳俱奉批抑布政司查報奉此又蒙巡按溫御史批同前事俱蒙批布政司查報蒙此行准按察司守巡鹽法等道各咨牒回稱查得二官委於前項

年月日期到任歷俸考滿任內徵收錢糧鹽課清勾軍
伍積貯稻穀五事實政俱已足額修舉委官盤量無異
應准給由各開具經薦稱職詞語起送到臣卷查先准
云云各等因俱題奉欽依移咨通行在卷今據前因該
臣會同巡按四川監察御史溫臯謨考覈得大昌縣知
縣易進宅心豈弟應務周詳三年訟理政平四境民安
上服榮縣知縣蔣守洵砥節無媿影衾奉公不辭勞瘁
賦額無逋循聲獨懋二官職業俱修考居稱職除批令
帶俸管事各將任內行過事蹟徑自造冊差入齎繳五

事冊揭行令咨送部院外理合具題伏乞勅下吏部將
知縣易進蔣守洵再加考覈酌議題覆施行爲此具本
謹題請旨天啓四年十月初四日上奉聖旨吏部知道

糾劾大計方面疏

題爲糾劾不職方面官員以備考察事天啓五年正月
適屆計察之期方面官員例應糾劾以肅憲體蜀中自
罹兵火其効勛前後各監司皆最勞苦而又當缺員
之多實苦撻索之難顧大典難廢未敢隱庇據采訪有
疵議者得四人焉臣謹會同巡按四川監察御史吳尚
默爲皇上陳之四川布政司分守川西道叅政加陞二
級戴燦文學素優才猷亦練卽百日城守九死一生臣
與之患難同事有不忍苛求者但叅據衆論皆謂本官

神情耽於吟咏而防檢多疎意氣重在交游而情面未割聽書吏張道學之譁張多被指騙信指揮張應甲之聳誑遂致侵欺州縣缺官而濫委吏員經歷誰縱嚙禾之碩鼠解糧一萬而少至二千七百豈盡奸弁之侵漁奉差經歲尚無復任之音耽戀丘園殊少急公之誼所應照不及例以新銜改調僻近者也按察司清軍驛傳道僉事全良範雄心未沮暮氣無多年力旣已衰遲舉動更多愆悞擔負小鹽例不起科而槩行徒擬窮民之皮骨俱銷點軍不到自有常條而送饋註免各軍之怨

謗何堪詞狀無不濫准每將强半暗發祇欲塞道途之
耳目問理自有專司輒自親提招擬何以肅表帥之觀
瞻至如出灌縣准狀而預借縣官之贖鍰祭都江放水
而私折致祭之牛羊瑣屑已甚誹笑難堪但其事每過
於執拗而權或竊於羣小盛氣雄心遽難抹殺亦應照
不及例量調簡僻者也敘馬瀘兵備道副使侯國意念
真醇心地樸直偶處危苦之地亦甘馳逐之勞但耳旣
失聰足復病跛氣奄奄而不振心汲汲以求歸任用舍
人戴伸而每事聽其指麾縱放家人出外而各官未免

私饋報功既已虛張聞警輒爾遠徙總由意念懈於當官是以防範疎於馭下浮名真如束縛三徑已賦歸來所當照老疾例子以致仕者也遵義府知府胡悅安操履本自安貞神情未免綿弱僅能株守絕少幹才郡城雖云殘燬而各屬無恙何以躊躇不前督餉既有專司而乾銷過半難謂稽查有法聽心腹何一龍等需索糧例留批不發淪戶無不吞聲任管家張二受姦占民婦悉置不問羣民遂多詈口羈旅苦於棲遲艱危何曾料理但其意念真醇操持未壞戡亂雖非所長居常自能

料理併當照不及例改調簡僻者也理合具題伏乞勅
下部院備加叅酌分別議處庶監司知儆而表率慎肅
矣爲此具本謹題請旨天啓四年十月二十八日上奉
聖旨該部院知道

糾劾大計有司疏

題爲糾叅不職有司官員以肅計典事天啓五年正月
適當計吏之期節奉部院申飭功令森嚴臣卽愚陋不
敢不搏采廣諮以佐末議維是身處行間境屬遼闊耳
目聞疎多未周知謹據司道造到冊揭備行叅酌適巡
按御史溫臯謨巡方事竣臣與面訂明白隨會同新按
臣吳尚默得各有司應議者十有八人其以病告與已
經劣轉中尚有應指摘者亦有在任微瑕而議未歸一
者俱明註冊內以候酌處除將事實底冊徑齎部院各

衙門謹臚列不肖諸狀爲皇上陳之并研縣知縣鄭天
懿一善無聞四維盡決行事旣多瑣屑剋利必盡銷銖
詞狀每紙夾銀七八錢模著卽准明是以官爲市牌票
僉發定差五六人下鄉逼捉豈得與民無擾告詞訴詞
一事兩問以擬贖草役收役百計翻覆以索錢多科濫
罰卽窮民之豬羊鷄鴨破衣敗絮皆准折於當堂假公
濟私凡一切馬戶里排督夫運餉盡剋入於私橐官箴
旣已大壞吏議自當首加大寧縣今丁憂知縣李邦鑑
縱肆有聲攫噬最毒逐事需求多術剝民血髓咸枯錢

糧每兩加耗三錢三里之簿籍可證場戶每家索金四兩各竈之白送堪嗟受真盜田金月之金銀而立斃無干之李元取富商齊東池之厚賄而打死赴告之孫國明人命幾同草刈扁送寡婦五十家而得謝二百五十兩扁送里長六十家而得謝一百八十兩官常全爲利媒恣取未解之糧多行乾沒妄指軍前之役徑自私侵小民怨口喧騰去後焚聲大著宜賓縣知縣邵以嵩心地糊塗行履狂悖沉湎旣濁其神焚求全不知足用書手涂一化爲主文每事憑其指引倚門子周思忠作心

腹諸賊悉與交關大戶劉仕坤拏監黑獄勒銀一百兩
代送有據里長萬楊樂疑其暗揭酷責四十板瘐死堪
憐拆封每十兩扣羨一兩各收頭無不有口詞狀計進
銀不計曲直卽干證曾不放鬆親弟改作陳永伸任其
在外強占民婦包攬詞訟防範業已全疎楠木取造大
馬船不給行戶令娼供飯使僧作工秋毫無不具柝檢
押之潰已甚閭閻之擾難堪以上三官處心全昧夫廉
恥敗類不齒於官常民怨已盈公論咸擯所當照貪例
革職爲民者也榮經縣知縣林之棟自負才鋒實沉慾

海奸惡常違人性操縱偏假神叢節令生辰盡索各商
之餽原被詞訟一槩三兩之謠王仲誠子被人殺疑其
揭謗而父子俱斃於杖下肺石豈免於號冤張宗文猾
吏神奸聽其唆撥而酷杖多中於無辜良民遂爲之重
足鹽茶不捕私販何以飭防軍糧逐季扣侵焉能弭謗
行止旣苦於乖張職守難容其忝竊原任建始縣知縣
今陞河南裕州知州劉世寧才窮五技守媿四知在任
碌碌無稱去後嘒嘒多議徵糧明加一暗加一三年之
人不貲下鄉准騾馬准土紬四境之騷最苦指軍餉借

大戶龍仕顯等三百餘兩徑入私囊何以塞里排之口
借抽扣裁阜壯王大坤等二百餘金全無下落實難服
各役之心馮麒麟媳通姦不行正罪而止將尚氏變價
入橐是何法紀劉四私出內衙強取貨物而反責各行
告討物價全昧防閑官箴旣已大踰公道自當追議原
任名山縣知縣今陞永安州知州劉爾完撫字無能侵
漁有術託疾經年閉閣倖陞百計營私取竹木造器皿
役銀匠打首飾碌碌曾無虛日短典史之常俸剋阜快
之工食嗷嗷致有煩言寵用書手楊升貴致令以撥置

起家苞苴之入可知重責里長王大智必欲如加二常
例膏髓之椎可憫谿壑既已滿盈褫斥自是難免原任
永川縣知縣今陞南京兵馬蔣承臯性本謙和才非振
勵在任猶可塗抹遇賊便爾張皇官存而印信獨亡終
難推諉於被劫開糧而原單見在未可藉口於挾讎獨
是患難逼迫事出異常而窖銀尚在足明初志名義殊
難苛責褫斥自是相宜以上四員治行無聞裂檢有據
或敗露於當官或指摘於陞任均應照不謹例革職閒
住者也大竹縣知縣程應誥賦性一味糊塗作事維人

播弄防維決裂狐鼠縱橫當堂審事全憑心腹傳惟士
在傍傳示幾同木偶無知臥病在衙專使庫吏胡現龍
拆封秤兌信是神叢有假大盜陳元光發審縱脫直至
隣水拏獲而猶茫然不省總書黃雲鳳恣意侵剋陰與
佐領通同而反一力祕護六曹之敝壞已甚兩年之道
負獨多此一官者所當照罷軟例與以致仕者也遵義
府通判張盛治遇難頗矢節槩遷官遂中病廢無志馳
驅有心傲放憑到半年而猶戀縣印難云弘濟艱難甫
入遵義而卽稱病危豈其遽染瘴癘初則移居真安後

乃復出資縣百檄不回一去自決烟霞之癖已堅膏肓之病難挽所當照有疾例與以致仕者也汶川縣知縣甘受誥才能濟暴巧以營私初政儘有聲名核實全多恣肆錢糧每十扣三又搭低假何怪軍士葉胡保等之號呼瓦寺發銀四百止與百兩總累字識熊應林等之扣補受木商馬台之三百金而給牒開厲禁之山場豈是綢繆之策因打兒加之姦使女而迫挾該土官之百兩全是激變之媒奉牌督餉而四出借銀仍迫各士民保留急公何有查取花楸而生事借釁竟受高啓直餽

賂覓利無遺彈丸之騷動難堪邊圉之挑釁可慮江津
縣知縣丁天躍好酒誤事任性用刑履任雖止七月怨
聲已盈萬口信積猾熊啓富等之曲諧杖夾悉從新製
任門子漆惟春等爲心腹沉湎豈顧官箴衛差劉應啓
索討回文發怒立斃杖下曾犯何條駁客段二官赴堂
訴理喝阜劈打捐生全無惻隱阜快結爲天罡朱萬聰
劉人龍等之被嚇有據審理如赴地獄夏民皞宋榮合
之多命合冤道府旣經質明民社豈堪再寄蓬州知州
商之葵執拗自用調劑無方督餉雖效勤勞在任未免

指摘錢糧每兩加收一錢已經刑官之驗實禁獄濫收四十餘人難免無辜之受累縱公子後堂以通線索牟張明等之餽送有據責阜快領銀以買新絲傳典禮等之賠累堪嗟署邑而受各吏禮銀全無檢押點差而取火籤一兩最起煩言大開既已不守公典自是難逃以上三官或地簡任淺或督餉效勞皆無不可原之情而恣睢自肆幾激地方之變撫字無方不理士民之口均應照浮躁例重加降調者也成都府同知侯世延營營嗜利逐逐行私心地全欠光明舉止實多狼狽用吏張

朝鳳爲主文私開後戶每事憑其過送縱僕五管家出
羊市姦占民婦掩耳若爲不聞簡州鄉送從叛王廷達
等十七名忽爾盡放則人有五十兩之饋銅官新報馬
戶一百家不肯應遞則官有三百兩之扣及署資陽僉
糧則每石紅錢一兩民髓俱竭問贖而追比不出三日
刑毒難堪姑以守城之勞聊擬薄禡之典南部縣知縣
吳諭質本優柔才更庸闇四境啼號不問六曹蠹弊日
滋每事取決於典史任其縱盜害民漫無覺察徵收全
聽之庫吏大糧完未及半竟爾寢停當軍旅倥傯之日

釀冥頑弛廢之習檄屢下而不問官雖有以若無巖邑
實所不堪寒氊庶幾可擁溫江縣知縣蔣元德才猷短
淺舉動濶疎寸衷漫無主持羣小任其撥置戶吏郭完
美不到則不坐堂積書王寵未至卽不審事勒索錢糧
火耗半入羣奸之橐催督軍前餉米全無清楚之單劉
氏夫死何罪而用夾棍嚴刑則伊叔舒應嗣爭財業有
百金之餽寶氏鄉居守寡理宜曲成而遣門子作媒則
差頭巴文良貪色曾受後堂之囑一印二官歌謠旣已
騰播十年九牧間里豈任誅求花縣實難綰符芹水猶

堪振鐸巴縣知縣今丁憂戴文箕儀狀頗偉識度亦明
舊任雅著能聲改調便多掣肘收糧偏重於鄉戶難服
黎庶之心問理多徇乎情面未免紛囂之口旣任爲楚
招兵而又委匪人從事公務等若弁髦領過餉銀二萬
而忽稱行糧無措到處爲之騷動治撫已掛彈文巴國
亦無善政維其歷任尚淺操持未壞煩劇誠非所任簡
僻似可相安原任南溪縣今改雲南定邊縣知縣李聯
魁心知謹畏才乏精明荒殘頗欲調停展措每多紕繆
追求掇捕權盡落於奸胥致積惡態繼成之恣意橫行

督餉催夫事每至於遲違雖推官宋萬畧之嚴催不顧
惟是地苦新殘官甫數月和緩或以有爲改調庶幾就
理射洪縣知縣雷靈雨頗知振刷雅負剛方無奈吹索
太苛遂致張弛失當甫下車而專用大板酷刑咸有曷
喪之思比錢糧而竟日夾搜不放遂起閭閻之號差阜
下鄉追贖四境遂以騷然查井遍行科罰各戶因而逃
竄蓋其志思有爲而事每任性稍裁苛刻之偏尚有循
良之治以上六官治行咸乖而劣狀各異所當照不及
例或調簡僻或改教職者也理合具題伏乞勅下部院

備加叅酌分別議處庶官邪知儆而計典有裨矣爲此
具本謹題請旨天啓四年十月二十八日奉聖旨該部
院知道

議補邊道中軍疏

題爲議補邊道中軍員缺事據四川監軍帶管兵巡遵義道按察司僉事盧安世呈稱本道標下中軍奉兵部題奉欽依以守備武聲華實授奉差獻俘推陞叅將又奉部文以茂州衛指揮曹守爵陞補查守爵向在永寧軍前染病於天啓四年六月內病故看得加銜守備蘇迪塞上千城營中幟羽論功酬勞委應實授伏乞本部院俯查節次批詳憫念伊父歿於戰陣本官屢建多功合無具題填補已故曹守爵員缺等因又據監軍道盧

僉事呈稱本道中軍守備奉欽依推按院下督陣加銜
守備何湛然實補第湛然向隨按院効用未到信地查
得中軍加銜叅將吳攀龍措置精神豁達臨戎敢勇爭
先揭查功冊本官擒斬招降爲數頗多此本道身親入
巢勇往直前之將也攀龍以虛銜爲湛然代勞情屬不
堪合乞題請頂補何湛然員缺庶使本官前勞稍酬援
黔勇敢等因各呈詳到臣據此查得遵義道中軍守備
武聲華已陞叅將又經推補指揮曹守爵填補該道詳
稱守爵物故論功以加銜守備蘇廸題補又監軍僉事

盧安世下例有中軍一員傳宣號令該臣於天啓三年五月內具疏將守備何湛然陞補祇因湛然先隨張溫二按臣委赴石泉署理守備軍事是以未赴該道任事今盧僉事兼攝兩道業於本年十一月十六日統兵三萬進遵義府城出兵鎮南關援黔勦賊則二道中軍各有傳宣軍令重任時不可缺該臣看得加銜守備蘇廸年貌壯偉弓馬熟嫻痛父累革之冤屢建殺賊之績加銜叅將吳攀龍穿楊絕技拔幟宏猷懋樹擒斬之功大奮撻伐之力二官之勞委應酬錄旣經該道議詳前來

理合具題伏乞勅下兵部再加查議將加銜守備蘇迪
補遵義道下中軍守備填曹守備員缺加銜叅將吳攀
龍補盧監軍道下中軍守備員缺仍各以都指揮體統
行事各給憑劄前來以便轉行二官任事建功其守備
何湛然奉命二年未曾任事合無祇與守備虛銜聽按
臣委用庶勞逸適均而人情競勸矣爲此具本謹題請
旨天啓四年十二月二十二日奉聖旨兵部知道該本
部覆奉聖旨是

縣令給由疏

題爲遵例考覈給由官員事據四川布政使司呈奉臣
批據安縣申准本縣知縣沈愉關稱見年三十二歲陝
西漢中府寧羗州人由舉人萬曆四十四年三月內除
授山西平陽府臨汾縣儒學署教諭泰昌元年十月內
陞今職天啓元年四月十一日到任扣該天啓四年三
月初十日連閏實歷俸三十六箇月考滿又據綿竹縣
申准本縣知縣譚先哲關稱見年三十歲貴州平壩衛
籍湖廣長沙府長沙縣人由舉人天啓元年六月內除

授今職本年十月初六日到任扣該天啓四年九月初五日連閏實歷俸三十六箇月各三年任滿例給由云云該臣會同巡按四川監察御史吳尙默考覈得安縣知縣沈愉慷慨能赴省難廉平最得民和野蔚桑麻庭空狐鼠綿竹縣知縣譚先哲實政曲周民隱嫖修不染俗氛溝瘠春回案牘飈掃二官職業俱修考居稱職理合具題伏乞勅下吏部將知縣沈愉譚先哲再加考覈酌議題覆施行天啓四年十二月二十二日上奉聖旨吏部知道

塘報永遵二路出哨

爲塘報事據監軍道副使謝渭僉事劉可訓知府鄭朝
棟總兵李維新塘報奉本部院檄令仰道鎮卽統兵分
兩路徑進畢節驛子直搗大方奉此本鎮於天啓四年
十一月二十日移鎮赤水衛差將官湯廷耀胡汝高李
國選等渡河二十四日路遇前鋒奸細西苗各將追殺
斬級四顆生擒苗賊一名趕至客仲壩賊兵無數來衝
官兵大戰斬級八顆馬二匹槍刀三十五件又斬易習
等三顆生擒苗婦四口各苗兵走入大箐至十二月初

一日夜本鎮預發前鋒郭起柱潘應奎率兵分道找搭浮橋繼發將官秦衍祚劉宗良馬繩祖楊元孔全斌凌九疇等由上渡旗鼓官張洪烈趙瓚李維賢李棲鳳等由中渡次第進發本鎮於初八日親渡赤水河劄營層臺又差旗牌蔡逢春龔應試督陣至板橋西賊無限接戰官兵奮勇大殺遵標二營斬十九顆馬繩祖營斬五顆楊元營斬六顆郭起柱營斬十三顆孔全斌營斬八顆李大用姚化民凌九疇潘映奎陳章周繼先楊光增張令樵崇智等各營共斬四十顆生擒猓獍二名鬼師

者弄馬二十四匹各賊敗潰奔入雪箐之中救出海子
洞降將朱三鳳等鬼師者弄供稱二苗尤股烏撒官保
等欲率兵三路來攻永寧等項虛實之情除深進之攻
另報外等因又據監軍帶管遵義道僉事盧安世塘報
本道遵令會同副總林兆鼎及加銜副將侯良桂陳一
龍張奏凱將官吳攀龍等及漢土降兵共三萬五百餘
名於十一月十六日齊進遵義府城公哨劄營招安百
姓修葺城池發將官胡斯化王尚明各帶先鋒兵勇逼
金刀鎮南遠探十二月初二日西賊四大營至板角山

與官兵對敵賊兵中彈逃生者箭傷墜馬者不計其數
亂竄各逃入箐我兵追趕賊棄刀槍滿路得獲器械極
多阿烏逃陳伏虎等三名見勢重難敵投降本道厚賞
令其立功方准投見各等因塘報到職據此查得永遵
二路久已勒兵待進單候黔中信息但恐西賊狡謀出
沒急檄各道鎮出兵總鎮駐赤水渡層臺兩次殺賊百
餘因雪厚箐大各苗遂得據險藏身遵義盧僉事前鋒
遠哨遇敵雖無斬獲銃箭傷者亦多得獲器械足憑只
候黔中確信一至三路大兵卽會合齊進理合塘報天

啓四年十二月二十二日塘報兵部職方司